

filio ascriptum cœlo æthereo seu stellato, à quo Fatum suam sibi vendicat originem, tam lona quam mala in inferiora impluens, ita quidem cognomen *Elohim Sefhirotæ* seu numerationi tertiæ præfidens, atque spiritui sancto relatum, cœlum infimum seu elementare respicit, in quo est omnis mutatio generatio & corruptio inter terrestria, ventorum, tonitruorum & cæterorum meteororum violentia in medio aere, sed & hoc lucide demonstratur ab iis qui personas Deitatis sacrosanctas, creantes cum creaturæ proprietatibus comparant: Patrem videlicet corpori solari, quasi essentiæ & quidditati comparantes, filium siue verbum radiis ab essentiâ illa emissis, atque spiritum sanctum ab utroque exilientem calori seu effectui, sic etiam vita seu fons cœli ætherei (in cuius centro posuit ille tabernaculum suum) erat cœlum Empyreum, quasi filii, esse suum à patre accipientis, & iterum anima & vita cœli Elementaris, est cœli ætherei virtus, ita ut luce clarius videaris, cœlum Elementare Vitam & Esse suum mediate accepisse à cœlo Empyreo, quasi patre primo in rebus creatis, nam prima creatura erat lux, atque immediate à cœlo stellari quasi filio, non aliter quam in mundo ideali atque Archetypico videmus, spiritum sanctum in numero personali à patre & filio progressum suum habuisse.

Vnde certum est harum personarum sacrosanctarum effectus in mundo typico esse tales à nobis relatos, & consequenter per effectum comprobatur, quod in primis cœlum intellectuale angelicum atque empyreum sit suaue, mite atque beneuolens domicilium beatis assignatum, utpote qui iuxta proprietatem patris est Zenobium sacrum seu sanctum sanctorum, Angelis DEI atque animabus sanctis appropriatum, in quo sub vmbra alarum Iehouæ in securitate ab omni seuera Dei proprietate agunt in hoc mundo. At *Cheter* secunda proprietates, quasi *sephirotæ* secundæ effectus, fatum in mundum imponit, quod tam bonum quam malum creaturis sublunaribus importat, hinc inde denotans essentiæ diuinæ naturam, tam ad punitionem quam ad clementiam esse inclinatum, vnde ut in *sephirotis* inter *Cheter* & *Binah*, seu *Ehieh* & *Elohim* ponitur *Hochma*, ita quidem eius effectus cernuntur inter cœlum Empyreum, locum scilicet quietis gratiæ, & felicitatis, atque illum inferioris abyssi, cœlum videlicet elementare, vbi nulla fere quies, & multa vexatio, tam in cælis, hoc est aere, quam in terris, utpote in quo regnat spiritus ille rebellis, qui à sacris scripturis vocatur princeps huius mundi, cui aeris imperium appropriatur. Hinc ergo patet, quod quamuis dicatur, quod spiritu ab ore Iehouæ omnes mundi & cælorum virtus creentur, tamen intelligere debemus, per hoc tam bonum quam malum secundum merita creaturæ ab eodem spiritu ei aspiratum. *Vita* (inquit sapiens) & *mortis* habet dominus potestatem, qui deducit ad portas mortis & reducit, Sap. 16. 13. Et alibi, *Bona & mala, vita & mors, paupertas & honestas à Deo sunt*, Eccles. 11. Et alibi, *Considera opera Dei quod nemo possit corrigere quem ille despexerit, in die bona fructu bonis, & malum diem præcaue, sicut enim hanc ita illam fecit Deus, ut non inueniat contra eum homo iustas querimonias*, Eccles. 7. 14. Quibus innuere videtur, quod variæ, imo vero natura oppositæ sint Dei in hoc mundo actiones, Pater *Ehieh* est author bonitatis, quam exequitur filius *Iah* in sapientia, impluendo eam à sua porta luminosa *Hochma*: Spiritus *Elohim* ab utroque, impiis terribilis, etiam à *Iah* tanquam utroque extremo participante assistitur in suo officio. Atque hinc dicitur *spiritus potentie Dei vendicans, & iustitia persequens iniustos*, Sap. 11. 12.

Sed pergamus, *El* est cognomen portæ lucidæ seu *sephirotæ Chesed*, clementiam & misericordiam in inferiora infundens: At *Elohim Gibbor* in illa *Geburah* seueritatem denotat & punitionem; in sexto autem ordine *Eloah* seu *Iehouah* formositatem & gratiam per portam *Tiphereth* impluit. At vero quatenus in medio est inter *Ehieh* & *Adonai*, ita de utroque extremo participare dicitur, utpote quæ proprietates quandoque punit, sic etiam *Iehouah Sabaoth* portæ *NetZeth* præfidens, victoriam & triumphum arguit, sed non in seueritate, sed in eius excellentia, in amore iustitiæ, & tamen iniustis opponitur; *Hod* etiam formositatem & laudem dat, cui *Elohim Sabaoth* prædominatur. Porro etiam *Sadai* per *Iesed* impluit redemptionem & quietem, vnde & boni sunt eius influxus, & benefici. Denique ut *Ehieh* gratiam & clementiam paternalem emitteret per suam portam regalem, *Cheter* seu coronam in radice arboris *sephiroticæ* ita quidem *Adonai* à summitate eiusdem per suam portam *Malchut* emittit seruitutem, & miseras, & punitionem in inferiora.

Vnde liquet quod in his numerationis *sephiroticæ* ramis habeamus quatuor miserationis & clementiæ diuinæ testimonia, videlicet proprietates *Ehieh* primæ *El* quartæ, atque *Iehoua Sabaoth* septimæ, & *Sadai* nonæ, habemus autem non nisi tres extremæ seueritatis, videlicet *Elohim* tertiæ, *Elohim Gibbor* quintæ, & *Adonai* vltimæ. Denique habemus tres de utroque extremo participantes, videlicet *Iah* secundæ, quæ nihilominus ad clementiam tendit, *Eloah* sextæ, & *Elohim Sabaoth* octauæ; Nam planeta ad quem *Elohim Sabaoth* impluit suas qualitates, est Mercurius, quem experientia notauit esse bonum cum bonis, & malum cum malis, vnde cū *Elohim*, id est, timore atq; pauore, ac deniq; perturbatione, *Sabaoth* seu requies iungitur. At vero certum est, quod hæc proprietates de utroque extremo participantes sint magis ad clementiam & misericordiam procliuës: Vnde dicit Propheeta, *Deus clemens & misericors, patiens, & multa miserationis, & ignoscens super malitia*, Ionæ 4. Atque iterum, *Tu dominus miserator & misericors, patiens & multa misericordia & verax*, Psal. 36. 15. Et alibi. *Deus pius &*